

եւ ի կէտ ընթացից երթեւեկութեան ճանապարհին զերեզմանաստանի՝ ընդ նոր իմն չքնազ գուժի զոչէին ծերպք վիմաց ընդ նոյնս համակ ձայնակցութեամբ յօրինեալ, եւ այլ յերկուց կողմանց հնչմունք արձակէին արտաքս թա՛մ բա՛մ զօ՛մ փօ՛մ ըստ երգոց նաժշտացն երգակցելով ի դրուատ մեծութեան Ալեքսանդրի:

Այս ինձ անվավեր սփոփանք եւ ընթերցողաց դմտաց իմն է աշխատանք, ընդունայն ջանոտութիւնք եւ զուր վաստակք: Զի նետ բարկութեան Ամենակալին հարաւ յիս եւ ո՞վ ոք իցէ որ կարիցէ հանել զայն յինէն: Սուսերն սրեալ խաղաց ի վերայ իմ եւ ո՞վ էր կարօղ հանդարտիլ նմա եւ հանդարտեցուցանել: Զեռն Ամենազօրին մխեցաւ յիս եւ ո՞վ է ընդդէմ կալ ժուժել: Ողբասցէ զիս Անաթօթացին մարգարէ, որպէս երբեմն զՍեդեկիա իւրովքն եւ նորին ժողովրդօք՝ զածեալսն ի սով, ի գերութիւն եւ ի սուր: Ըստ որում միտք իմ ցնդեալ ցնորին աղճատեալ ի շաղփաղբանութիւնս արժանի ձերում մեծութեանց՝ ոչ յօրինելով զչար գանկատի խոցոտեալ սրտի: Ո՞յք լիցին ինձ ընկեր. ո՞վ ոք իցեն ծնօղք իմս օրինակի, թէպէտ որ զումանս ի վերոյ յիշեցի: Բերէ՞ք միթէ օրինակ ինձ զծնօղս աղեգալար Պէյթլէհէմեան, որոց մանկունքն քարչեալ յինքեանց ի ձեռս սուսերամերկ դահճացն էրօտէի՝ իբրեւ զծաղիկ նուննեաց դիաթաւալ արիւնաներկ յերկրի ճապաղեալ. որք զքաղցրութիւն եւ ոչ զգառնութիւն նոցա էին տեսեալ. Բ՝ յորոց բազումքն զպահակսն ունէին ի տան եւ յայդիս եւ յանդաստանս. Գ՝ յորոց բազումքն ծնան մխիթարութեամբ. ես փայտ գօսացեալ եւ զնմանն չունիմ եւ ոչ այլ ոք: Տա՞յք միթէ ինձ օրինակ զՏիրածինն եւ ջանկուհի զողբ կսկծագին, որ ընդդէմ որդւոյն Յիսուսի ի խաչելութեան: Վասն որոյ ասեմ երկու աւուրբք